

澎湖廳志卷十一

人物下列女

澎湖瘠壤也其俗儉嗇其婦女習勞勞則善心生焉  
儉則紛華屏焉耳目不雜邪僻無自而萌斯其節  
操乃相觀而喜歎習俗漸漓淑慝罔辨不有旌別  
曷樹風聲夫表微闡幽士君子責也爰採遺芳弄  
之貞木以為勵節閨門者勸其列女傳第八

目錄

名媛

貞女

節烈

女壽

貞節

貞烈

附錄

澎湖廳志卷十一

總論

名媛傳

許氏却娘小赤嵌鄉諸生許必達女適岐頭鄉諸生陳  
大業性端靜不苟言笑佐夫教子皆堪為法嘗曰吾見  
子孫如見賓客其莊重類如此姑年衰多病氏先意承  
志夜數起問視侍奉久而不倦持家勤儉見戚族有急  
未嘗不量力周之子桂林孫維廉維錦維新俱有聲譽  
序間今曾孫鐘奇已遊庠矣  
鮑氏媽宮澳人適同社林超超父業杉行積欠者千餘  
緡既歇業鄉人值年穀順成猶來還債而年久帳簿字

跡模糊或難辨多寡一日鮑氏潛取舊帳簿十餘本燒之謂超曰子孫能自立不必藉此奈何以此累其心乎氏壽終七十有五

女壽

陳梓娘八單與網坡澳吳理妻温良寬厚治家有法訓兒以義讓子六人皆孝養和順回世同堂合爨六十餘人勤儉雍睦善氣充溢門庭氏年九十九  
顏長娘八單與水坡澳高旁妻性賢淑持家井井有條子五人皆遵母訓退讓為家五世同堂和睦無間氏年九十九續編上

澎湖廳志卷十一

二

鄭盼娘鳥嶼社人瓦上社張中妻也享壽一百零一歲

五代同堂陳維新採

吳錦娘東后社人適港底社李天富喜事翁姑克勤克儉助夫成家道光丁亥年卒壽九十有四五代同堂孫

時熙入津李煥章採

許芋娘菓葉社人夫山社王維常之妻也現年九十一

五代同堂孫汝亨遊庠蔡傑採

林乾娘孀宮澳郭元吉妻現年九十三四代同堂子日

井遊庠林維藩採

楊官娘南寮社人適雞母塢社歐陽障現年九十六五

代同堂子孫三十餘人黃濟採

列女傳總論

澎湖各社聚族而居婦女習勞尤甚性情拘謹耳目專一自非放誕性成從莫或誘之為非者初不知有旌表祠祀之榮並不待讀書明禮義者而後能以節見也續編所列於例固未盡符然當時延訪綦詳必有確然可共信者在又何必懷河間之疑慮而今彤管失專乎要之節烈其難其慎固不敢援此為例而善善不妨從長姑存其舊以俟知者至於冥冥之中則清者自清濁者自濁縱非吾人所得洞悉又可不竭其耳目之力以維持風教而為梓里之榮也乎夫十步之澤必有香草今者一澳之內煙戶數千矣而謂無一人可舉者賊斯人者也謂人言無一可信者是必居心慘刻而不樂聞人

澎湖廳志卷十一

三

善者也嗚呼澎湖自開闢至今從未聞有請旌節烈之舉幸得良有司修明文獻開局蒐採則匹婦一生苦節僅賴一時載筆以不沒其真而讀書好學之君子顧或以徒勞罔得而不暇採則地方何貴有吾儒而吾儒平居之讀書誦學高談忠孝者果何為也哉吁